

समां - 12:25 hrs.

<><><><><><>

LG-Judo Cluster

उपराज्यपाल मनोज सिन्हा होरें आखेया जे जम्मू-कश्मीर च आतंकवाद अखीरले साह लै रदा ऐ ते शांति ते रमानदारी कन्नै खिते च तरक्की ते खुशहाली आई ऐ। एल.जी होरें एह गल्ल 10मीं अखिल भारती पुलस जूडो क्लस्टर 2025 प्रतियोगता च बोलदे होई आखी। जम्मू-कश्मीर पुलस दी सराहना करदे होई- उनें आखेया जे पुलस नां छड़ा आतंकवाद दा सामना करा रदी ऐ सगुआं कन्नू बवस्था बनाई रखने च बी महत्वपूर्ण भूमिका निभा रदी ऐ। एदे इलावा नागरिकें दी हिफाजत करने दे कन्नो-कन्नी समाजी- आर्थिक विकास च बी अपना अहम जोगदान देया रदी ऐ। उनें आखेया जे जम्मू-कश्मीर पुलस नै इक शांतिपूर्ण ते स्थाई समाज यकीनी बनाया ऐ- जेड़ा केन्द्र शासत प्रदेश च औद्योगिक विकास ते पूरी-पराती तरक्की च मदद करा रदा ऐ।

<><><><><><>

LG Homage

लेफ्टिनेंट गवर्नर मनोज सिन्हा होरें राष्ट्र दी रक्षा लेई सर्वोच्च बलिदान देने आहले फौज दे दलेर जवानें - लांस हवलदार पलाश घोष ते लांस लाईक संजॉय घोष होरें'गी श्रद्धांजलि अर्पित कीती ऐ। इ'नें दौनें जांबाजें किश्तवाड़ रेंज च बड़े सख्त मौसमी हालात दे दरान आतंकवाद रोधी अभियान दे दरान सर्वोच्च बलिदान दिता। एल.जी होरें इंदे सर्वोच्च बलिदान गी नमन

करदे होई आखेआ जे समूलचा राष्ट्र सदा इ'नें दलेर सेनिकें दा कर्जदार रौहग। उ'नें इब्बी आखेआ जे दुक्खै दी इस घड़ी च समूलचा राष्ट्र, शहीदें दे परोआर आहलें कन्नै खड़ोते दा ऐ।

<><><><><><>

Itoo –Edu Review

शिक्षामंत्री स्कीना इतू होरें श्रीनगर आले सिविल सचिवालय च इक उच्ची स्तह दी बैठक दी अध्यक्षता कीती जेहदे च पूरे जम्मू-कश्मीर च स्कूली शिक्षा ते उच्च शिक्षा मैहकमे च चला रदी बक्ख-बक्ख परियोजनाएं दे संचालन ते प्रगति दा जायजा लैता गया। बैठक दौरान राष्ट्रीय उच्चतर शिक्षा अभियान- प्रधानमंत्री उच्चतर शिक्षा अभियान ते कैपैक्स बजट जनेही पैहलकदमियें दी स्थिति दी समीक्षा करदे होई मंत्री होरें चला रदी सब्भनें परियोजनाएं गी समें-सिर पूरा करने दे महत्व पर जोर पाया। एदे इलावा मंत्री स्कीना इतू होरें स्कूली शिक्षा च डिजिटल बदलाव दे महत्व पर बी लौ पाई ते सरबंधत अधिकारियें गी निर्देश दिते जे ओह स्मार्ट क्लॉसरूम- आई.सी.टी. लैब ते ऑनलाईन Content हासल करने आहली स्हूलतें गी तौले शा तौले लागू करान।

<><><><><><>

BSF –Winter Strategy

सीमा स,सीमा सुरक्षा बल बी.एस.एफ दा आखना ऐ जे उन्नै समूलचे जम्मू प्रांतै लेई औंदे स्याले लेई अपनी रणनीती तयार करी लैती दी ऐ तां जे धुंध जां कोरे दी आड़ च पाकिस्तानी आतंकवादियें दी घुसपैठ दी कुसै बी कोशश गी नाकाम कीता जाई सकै। बी.एस.एफ. दे जम्मू फ्रन्टियर दे आई.जी. शशांक आनंद होरें कल दस्सेया जे खूफिया जानकारीयें थमां पता लगदा

ऐ जे आप्रेशन सिंदूर दौरान पुज्जे दे नुक्सान कारण पाकिस्तानी आतंकी संगठन जियां जेश-ए-मोहम्मद ते लश्करे तैयबा अपने आपें गी परतियै खडेरने लेई पूरी टिल्ल ला करदे न ते इंदी भैड़ी कोशश ऐ जे मते शा मते आतंकवादियें दी भारत अंदर घुसपैठ कराई जा।

<><><><><><>

CS Fruit Transpiration

मुख्य सचिव अटल डुल्लु होरें कल इक उच्ची सतह दी बैठक च कश्मीर घाटी थमां फलें दी खेप मुख्य दे बक्ख-बक्ख हिस्सें च पुजाने लेई कीते जा रदे बंदोबस्तें दा जायजा लैता। बैठका च डुल्लु होरें जम्मू-श्रीनगर राष्ट्रीय जरनैली सिड़क दी मजूदा स्थिति दी बी समीक्षा कीती ते इसी परतियै पूरी चाली ब्हाल करने बारे बी जानकारी हासल कीती। उनें चेचे तौरा पर कश्मीर घाटी थमां औने आहले फलें दे ट्रकें ते बाहरा औने आहली जरुरी चीजें-बस्तें दे ट्रकें ते टैंकरें दी आओ-जाई दी स्थिति बारे बी तफसील हासल कीती। लमें छिंडे धोड़ी माल ढोआई दी स्थिति बारे पुच्छदे होई अटल डुल्लु होरें मुम्बई-कोलकाता ते बेंगलुरु जनेए महत्वपूर्ण बजारें धोड़ी रेल माल-गड्डियें दी सेवा शुरु करने दी जरुरतें पर बी जोर दिता ते आखेया जे एहदी संभावनाएं दा तौले पता लाया जा।

<><><><><><>

Secy- IT Park

सूचना ते टेक्नोलजी मैहकमे दे सचिव डाक्टर पीयूष सिंगला होरें जम्मू-कश्मीर च आई.टी पार्क तयार करने लेई खडेरें गेदे अध्ययन समूह दी बैठक दी अध्यक्षता कीती गई। सिविल

सचिवालच जम्मू च लग्गी दी इस बैठका च केन्द्र शासत प्रदेश च अंतराष्ट्रीय सतह दा इक आई.टी पार्क कायम करने बारे तयार कीती गेदी शुरुआती रिपोर्ट दे बारे च बी तफसीली चर्चा कीती। मीटिंग च फैसला लैता गया जे प्रस्तावित आई.टी पार्क गी आई.आई.टी जम्मू दे बैनर हेठ विकसित कीता जाहग ते एहदे बारे रिपोर्ट दंडु चरणें च तयार कीती जाहग। पैहला गेड़ उच्च शिक्षा संस्थान दे नमूने दे रुपे च ते दुआ गेड़ एहदे निजी निवेश ते सार्वजनिक ते निजी सांझ- भैयाली दे इक नमूने दे तौरा पर कीता जाहग।

<><><><><><>

Buyer –Seller Meet

उद्योग ते बपार सरबन्धी कमीशनर सैक्रेटरी विक्रमजीत सिंह होरें रिवायती दस्तकारी गी बढ़ावा देने लेई बडगाम च खरीददारें ते विक्रेताएं गी किट्ठे इक्के मंच पर आनने आली त्रों दिनें दी **Buyer Seller Meet** दा उदघाटन कीता। इस कार्यक्रम दा आयोजन जम्मू-कश्मीर च बपार गी बढ़ावा देने सरबन्धी संगठन JKPTO आसेया कीता गया ऐ ते जम्मू-कश्मीर दी दस्तकारी-विरासतें गी बढ़ावा देने दे कन्नो-कन्नी एहदे च नमें सिरेया जान भरने लेई कीते जा रदे जतनें दे तैहत भारत सरकार दे कपड़ा मंत्रालय च दस्तकारी सरबन्धी विकास कमीशनर हुंदे आसेया इसी प्रायोजित कीता जा रदा ऐ। जम्मू ते कश्मीर दौनें खितें दे तकरीबन 50 कारीगर इस कार्यक्रम च हिस्सा लै रदे न- जिन्दे च हत्थे कन्नै बनाए गेदे जी.आई टैग आले बक्ख-बक्ख उत्पाद जियां जे पशमीना-कानी शॉल-सोजनी कढ़ाई-पेपर मैशे- Chain Stitch- बसोहली चित्रकला ते ऊन दी कढ़ाई आली बक्ख-बक्ख चीजें दा प्रदर्शन कीता जा रदा ऐ।

<><><><><><>